



REPUBLIKA E SHQIPËRISË  
ENTI RREGULLATOR I ENERGJISË  
BORDI

VENDIM

Nr. 75, Datë 14.04.2025

MBI

**DHËNIEN E AUTORIZIMIT NGA ERE PËR VENDOSJEN E KUOTAVE TË  
SHOQËRISË “YILDIRIM ENERGY EUROPE ALBANIA” SH.P.K. SI MJET PËR  
GARANTIMIN E DETYRIMIT NDAJ TË TRETËVE**

Në mbështetje të nenit 16 të, ligjit nr. 43/2015 “Për sektorin e energjisë elektrike”, i ndryshuar; neneve 9, pika 8, dhe 10, të Rregullores për procedurat dhe afatet për dhënien e autorizimit nga ERE për ndryshimin e statusit ligjor të të licencuarit, ndryshimin e ortakut/aksionarit që kontrollon interesat e të licencuarit dhe vendosjen e kuotave/aksioneve të ortakut/aksionerit që kontrollon interesat e të licencuarit si mjete për garantimin e përmbushjes së detyrimit/eve ndaj të tretëve, miratuar me vendimin e bordit të Entit Rregullator të Energjisë (ERE) nr. 235, datë 26.11.2021; si dhe nenit 15, të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; Bordi i ERE-s, në mbledhjen e tij të datës 14.04.2025, mbasi shqyrtoi relacionin me nr. 723/2 prot., datë 20.03.2025, të Drejtorisë së Licencimit dhe Autorizimeve, “Mbi kërkesën e shoqërisë “Yildirim Energy Europe Albania” sh.p.k. për dhënien e autorizimit nga ERE për vendosjen e kuotave të saj, si mjet për garantimin e përmbushjes së detyrimit ndaj të tretëve”,

**Konstatohet se:**

Për qëllime të shqyrtimit të kërkesës për dhënien e autorizimit për shoqërinë “Yildirim Energy Europe Albania” sh.p.k., është ndjekur procedura dhe është analizuar dokumentacioni si vijon:

**1. Kërkesa për Marrjen e Autorizimit**

- Shoqëria, me shkresën e protokolluar në ERE me nr. 127/11 prot., datë 10.06.2024, paraqiti aplikimin për marrjen e autorizimit për vendosjen e barrës siguroese mbi 100% të kuotave të saj, të zotëruara nga “Yildirim Albania Mining Investments” sh.p.k., si mjet për garantimin e përmbushjes së detyrimeve që rrjedhin nga “Marrëveshja e huasë së nivelit të lartë”, datë 24.05.2022, e lidhur ndërmjet “Yildirim International Mining Investments B.V.”, “Albchrome” sh.p.k. dhe “Yildirim Albania Mining Investments” sh.p.k., si kredimarrës, dhe disa institucioneve financiare ndërkombëtare, me “Raiffeisen Bank” sh.a. në rolin e agentit të garancive. Në zbatim të kushteve të kësaj marrëveshjeje është nënshkruar gjithashtu

“Marrëveshja e barrës siguruese kuota/aksione” nr. 2169 rep., nr. 1123 kol., datë 21.06.2022, ndërmjet “Raiffeisen Bank” sh.a., në cilësinë e barrëmarrësit, dhe “Yildirim Albania Mining Investments” sh.p.k., në cilësinë e barrëdhënësit, mbi 100% të kuotave të shoqërisë “Yildirim Energy Europe Albania” sh.p.k.

## **2. Shqyrtimi i Kërkesës dhe Kërkesa për Dokumentacion Plotësues**

- Shoqëria “Yildirim Energy Europe Albania” sh.p.k. është licencuar nga ERE në:
  - Veprimtarinë e tregtimit të energjisë elektrike, me vendimin e bordit të ERE-s nr. 257, datë 21.12.2021; si dhe në veprimtarinë e furnizimit të energjisë elektrike, me vendimin e bordit të ERE-s nr. 258, datë 21.12.2021.
- Në mbledhjen e bordit datë 19.07.2024, u vlerësua se, përpara se ERE të shprehej me një vendimmarrje për dhënien e autorizimit, shoqëria duhej të dokumentonte shlyerjen e kësteve të huasë dhe të depozitonte qëndrimin përkatës të bankës, në kushtet kur marrëveshja e paraqitur për miratim nuk ishte një marrëveshje paraprake por një marrëveshje e lidhur nga palët, e cila kishte prodhuar efektet e saj përmes lidhjes së mëpasshme të “Marrëveshjes së barrës siguruese kuota/aksione” nr. 2169 rep., nr. 1123 kol., datë 21.06.2022. Kjo kërkesë u bë në funksion të plotësimit të kuadrit të provave mbi përputhshmërinë e garancisë me rregulloren përkatëse, si dhe për shkak se deklarimi për kthimin e kuotave në gjendjen e mëparshme ishte depozituar vetëm nga shoqëria, ndërkohë që mungonte qëndrimi i bankës si palë tjetër në marrëveshje.
- Me shkresën nr. 127/16 prot., datë 06.09.2024, ERE njoftoi shoqërinë për plotësimin e dokumentacionit të nevojshëm.

## **3. Seanca Dëgjimore dhe Dorëzimi i Dokumentacionit Plotësues**

- Më datë 18.11.2024, u zhvillua seanca dëgjimore me përfaqësuesit e ERE-s, shoqërisë “Yildirim Energy Europe Albania” sh.p.k. dhe “Raiffeisen Bank” sh.a.
- “Raiffeisen Bank” sh.a. përcolli qëndrimin e saj me shkresën nr. 127/21 prot., datë 26.12.2024.
- Shoqëria paraqiti informacionin dhe dokumentacionin e kërkuar me shkresën nr. 723 prot., datë 29.04.2025.

## **4. Përfundime dhe Kërkesa të tjera për Dhënien e Autorizimit**

- Nga analiza përfundimtare e dokumentacionit të përcjellë nga shoqëria “Yildirim Energy Europe Albania” sh.p.k., rezulton se është dorëzuar dokumentacioni në përputhje me kërkesat e parashikuara në nenet 5, 6, 7 dhe 8, të “Rregullores për procedurat dhe afatet për dhënien e autorizimit nga ERE për ndryshimin e statusit ligjor të të licencuarit, ndryshimin e ortakut/aksionarit që kontrollon interesat e të licencuarit dhe vendosjen e kuotave/aksioneve

*të ortakut/aksionerit që kontrollon interesat e të licencuarit si mjete për garantimin e përmbushjes së detyrimit/eve ndaj të tretëve”, miratuar me vendimin e bordit të ERE-s nr. 235, datë 26.11.2022, si vijon:*

- **Neni 5, pika 2** - Kërkesa dhe dokumentet shoqëruese janë nënshkruar nga administratori i shoqërisë, në përputhje me kërkesat e Rregullores.

#### **Plotësimi i kërkesave të nenit 5:**

- **Neni 5, pika 4** - Dokumentacioni është paraqitur në gjuhën shqipe, në format origjinal ose të noterizuar dhe i shoqëruar me kopje elektronike.
- **Neni 5, pika 5** - Shoqëria ka bërë me dije se marrëveshja e kredisë nuk duhet të jetë e hapur për publikun, pasi klasifikohet si informacion konfidencial.

#### **5. Plotësimi i Kërkesës sipas nenit 8:**

- **Pika 1** - Janë paraqitur të gjitha të dhënat e kërkuara mbi shoqërinë, përfaqësuesin e autorizuar, arsyet për vendosjen e barrës siguruese, përshkrimi i detyrimeve dhe deklarata mbi statusin e kuotave.
- **Pika 2** - Janë dorëzuar të gjitha dokumentet përkatëse, përfshirë ekstraktin historik të regjistrit tregtar, vendimet e organeve drejtuese, marrëveshjen përkatëse dhe dokumentacionin tjetër shtetëror si më poshtë vijon:
  - **Gërma “a”** - Ekstrakti historik i regjistrit tregtar: Shoqëria ka depozituar në ERE ekstraktin e thjeshtë të regjistrit tregtar, të vulosur elektronikisht më datë 06.06.2024. Nga aksesimi online i ekstraktit historik rezulton se shoqëria “Yildirim Energy Europe Albania” sh.p.k., është regjistruar në QKB më 07.09.2021. Ortak i vetëm është “Yildirim Albania Mining Investment” sh.p.k. Shoqëria nuk ka pasur më parë raste të vendosjes së barrës siguruese mbi kuota.
  - **Gërma “b”** - Vendimi i organeve drejtuese: Është depozituar vendimi i Ortakut të Vetëm, i datës 27.04.2022 (në gjuhën shqipe dhe angleze), që miraton vendosjen e barrës siguruese mbi kuotat.
  - **Gërma “c”** - Marrëveshjet përkatëse: Janë depozituar:
  - **Marrëveshja e huasë së nivelit të lartë**, datë 24.05.2022, ndërmjet kredimarrësve dhe kredidhënësve, ku përcaktohet vendosja e barrës mbi kuotat e “Yildirim Energy Europe Albania” sh.p.k.;
  - **Marrëveshja e barrës siguruese nr. 2169 rep., nr. 1123 kol., datë 21.06.2022**, ndërmjet Raiffeisen Bank sh.a. (agjent i garancive) dhe “Yildirim Albania Mining Investments” sh.p.k. (barrëdhënës), që vendos barrën siguruese mbi 100% të kuotave të shoqërisë.

*Duke qenë se këto marrëveshje janë lidhur përpara marrjes së autorizimit të ERE-s, shoqëria ka depozituar me shkresën nr. 127/7 prot., datë 27.03.2024, deklaratën e Ortakut të Vetëm “Yildirim Albania Mining Investments” sh.p.k., ku konfirmohet angazhimi për heqjen e barrës siguruese dhe kthimin e strukturës së kuotave në gjendjen e mëparshme në rast të mosmarrjes së autorizimit. Në vijim, është depozituar gjithashtu edhe qëndrimi zyrtar i “Raiffeisen Bank” sh.a., me shkresën nr. 127/21 prot., datë 26.12.2024, ku banka shpreh gatishmërinë për të rishikuar parashikimet e marrëveshjeve të nënshkruara nëse nuk do të merrej autorizimi nga ERE, duke përmbushur kështu të gjitha kërkesat përkatëse në lidhje me këtë çështje.*

- **Pika 3** - Shoqëria ka shlyer të gjitha detyrimet financiare ndaj ERE-s.

## **6. Kushtet e Vendosura për Dhënien e Autorizimit**

- Dhënia e autorizimit nga ERE për vendosjen e kuotave të shoqërisë “Yildirim Energy Europe Albania” sh.p.k., si mjet për garantimin e detyrimit ndaj të tretëve, nuk e përjashton këtë të fundit nga detyrimi për të marrë autorizimet ose miratimet e nevojshme nga organet e tjera kompetente apo nga palët e treta përkatëse, në rast se kjo kërkohet nga kuadri ligjor ose nga marrëveshjet kontraktuale në fuqi.

*Vendosja e këtij kushti bëhet për të garantuar se autorizimi i dhënë nga ERE mbetet i kufizuar vetëm në kuadër të ushtrimit të funksioneve të saj rregullatore, pa ndërhyrë apo anashkaluar detyrimet ligjore ose kontraktuale që mund të ketë shoqëria ndaj autoriteteve të tjera ose palëve të përfshira në marrëdhënie financiare apo tregtare. Në këtë rast, duke qenë se marrëveshja e huasë dhe marrëveshja siguruese janë nënshkruar me banka të huaja dhe vendase, është përgjegjësi e shoqërisë të respektojë çdo detyrim tjetër jashtë kompetencës së ERE-s që mund të rrjedhë nga këto marrëveshje.*

- Shoqëria detyrohet të njoftojë ERE-n **në rast të heqjes së barrës siguruese ose të ekzekutimit të saj të detyrueshëm.**

Për gjithë sa më sipër, bordi i ERE-s,

### **Vendosi:**

1. Dhënien e autorizimit të ERE-s për vendosjen e kuotave të shoqërisë “Yildirim Energy Europe Albania” sh.p.k. si mjet për garantimin e përmbushjes së detyrimit sipas “Marrëveshjes së huasë së nivelit të lartë”, datë 24.05.2022, dhe në vijimësi të së cilës është nënshkruar “Marrëveshja e barrës siguruese kuota/aksione” me nr. 2169 rep., nr. 1123 kol., datë 21.06.2022, ndërmjet “Raiffeisen Bank” sh.a., në cilësinë e barrëmarrësit, dhe shoqërisë “Yildirim Albania Mining Investments” sh.p.k., në cilësinë e barrëdhënësit.

2. Dhënia e Autorizimit nga ERE sipas përcaktimeve të pikës 1 të këtij vendimi nuk e çliron shoqërinë “Yildirim Energy Europe Albania” sh.p.k. nga detyrimi për të marrë autorizimin/miratimin e organeve të tjera apo palëve të treta për këtë ndryshim, në rast se kjo kërkohet nga këto organe.
3. Shoqëria “Yildirim Energy Europe Albania” sh.p.k. të njoftojë ERE-n për heqjen e barrës siguruese mbi kuotat ose në rast të ndodhjes së një ekzekutimi të detyrueshëm.
4. Ky vendim është objekt rishikimi nga ERE në varësi të plotësimit/mosplotësimit të kushteve të vendosura në pikat 2 dhe 3 të këtij vendimi.
5. Drejtoria e Licencimit dhe Autorizimeve, të njoftojë shoqërinë “Yildirim Energy Europe Albania” sh.p.k. për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t'i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI**

**Petrit AHMETI**